

Vigeli Giger, Rueras



Buania 1996; il tuchiez da s.Vigeli annunzia la mort d'in vischin. Il Segner ha priu a casa Vigeli Giger da Rueras sesents ella casa da s.Vigeli a Sedrun. El ei morts el spital a Glion en consequenza d'in accident ella aulta e biala vegliadetgna dad otgontatschun onns.

Il Vigeli ei naschius ils 6 da zercladur digl onn 1911 a Rueras. Ses geniturs ein stai Giusep Maria Giger e Tresa Genoveva, naschida Giossi. El ravugl da nov fargliuns ha el passentau a Rueras ina emperneivla affonza. El menaschi puril ha ei tuccau baul da prender a s' endisar vid la lavur ed esser gideivels en casa e nuegl. A Rueras ha el frequentau las scola primara ed ha Camischolas ha el terminau il temps da scola cun la

scola secundara.

Silsuenter eis el semess en e fatg il pur ensemen cun siu frar Leci. Bugen suprendeva el era lavurs d'empau diltut enteifer la vischnaunca. Sias forzas e habilitads ha el era mess a disposizun alla publicidad. Aschia eis el staus fetg biars onns commember dalla cumissiun da gestiun dalla vischnaunca. Plinavon ha el funcziunau plirs biennis sco president dil Coop a Rueras. Era la musa ha delectau il Vigeli ed aschia ha el cantau ses 40 onns el Chor baselgia da Rueras.

Cugl onn 1975 ha el calau da far il pur e surdau siu menaschi a ses dus nevs. Scochemai eis el serendius a Sedrun ella casa s.Vigeli per passentar la beinmeritada sera dalla veta. Ses ligioms e patertgar ein restai a Rueras; pertgei cu el saveva serendeva el a Rueras tier ina viseta e gidar ils ses. Il Vigeli ei staus ina personaliad, in original enten siu far e demanar, in um cun ina statura robusta e marcanta, cun in saun humor. Sia cumparsa, siu passar si ha segiramein fatg lartg a biars. Il Segner ha denton disponiu e clamau el. Ils 9 da schaner eis el vegnius surdaus alla fossa. In grond conduct da bara ha accumpignau il Vigeli. El rauassi en pasch.